

عدد — ۹۵

امور اداره و تحریریه و اعلانات و سائرہ
ایچون مدیر مسئولہ مراجعت ایدللیدر .
عرفای امتک مقالات متصوفانہ لربنہ
جریده صوفیہ نک صحیفہ لری آچقندر .
درج ایدلیان اوراق اعاده ایدلنز .

جریده تصوفیہ

شیمدیلتک هفته ده بر نشر اولنور .

تصوفی ، دینی ، اخلاقی ، سیاسی جریده اسلامیه در .

نسخه سی ۴۰ پاره در .

ابونہسی : بر سنہ لک اعتباریلہ ممالک
عثمانیہ ایچون : ۴ آلتی آیلغی ۲۵ غروش
وممالک اجنبیہ ایچون اون ایکی فرانقدر

محل اداره باب عالی جوارنده ابوالسعود
جاده سنده نجم استقبال مطبعہ سی

لفظی مضرتہ شامل اولور زبازرد اولان له وعلیه تعبیاتی معلومدر .
مسئله ثالثه «الاماسی» قول شریفک مضارع صیغه سیله کلیوب ماضی
صیغه سیله کلیی اعمال صالحه یه فوق العاده ترغیبی تضمن ایستدیکنی
کوسترمک ایچوندرد .

خالص

تصوفات صوفیه دن

صوفی

(۱) درت حرفی ، صوکی بیه مشدده لی اولان صوفی ، تصوف
کله سندن کله اولوب ، اغه معناسی متصوف دیمکدر مجازاً اهل طریقه
علم اولمشدر .

(۲) صوفی ، بای نسیله اولورسه عبا ، دیبا کبی شیلره تعلق
ایستدیکندن ، فضل و مزیتدن عاری اولوب حیه و دستاریله افتخار
ایدن دیمکدر . درویشلر بوکا خام صوفی دیرلر ! . . .

(۳) صوفی ، تعبیر عوامیسی وجهه متقیلرک مراپسندن کنایه در .
شمسی نک :

« مسجد ایله مدرسه بی ترک ایلدک صوفیلره

حقه عبادت ایتمک یتر بزه ویرانه لر ؟

بیتمده کی صوفیلردر .

(۴) صوفیه ، ناسک اختراعیله رجال علمیہ نک عادی طبقه سنه
طاقیلش براسمدر . بعض متشدقلر بونی اصطلاح پردازلغه او یغون
کلسون ده یه « سوخته » ! یازارق طلبه علومه بر اسم خاص یایمقله بر
هنر صائمق ایسته مشلر سه ده کولنج اولمقدن زیاده بر شینه یارامامشدر .
بویله چکوب اوزاندقچه معنالی ده کیشن بو عنوانک دلالت
ایستدیکنی ماهیت ده شخصه ، استعداد ، جوهر ذاته کوره دائماده کیشمکدن
خالی قالماز .

صوفی نک جمعی صوفیون کلیر . صوفیلرک صافسی اولدینی کبی سفیه ده
اولور . قسم حقیقیسی من لم یزق لم یعرف ایله تعریف ایدیلن علم جلیل تصوف
منتسبینی اولان عرفا بالله در . تصوف ، صورتاً سیرتاً آداب شرع شریف
ایله متحلی اولوب فیوضات محمدیه دن ترین صفات و ذات ایدن اساتذہ
متکلمه نک حالی در . تجلیات الهیه دن واردات غیبیه یی استفاضه ایله
منابع قلبیه لرندن دوکولن سوزلر اهلنه معلوم ، نا اهلنه نامعلوم اولوب
قالمشدر .

کلمات تصوفیه ، شمسه باقعه چالیشان کوزلرک اضطراری صاحبان
دمعه لری کبی ، مرآت محمدی - که آندن الله کورونور دائم - نکران
اولا روحلرک رشحه لریدر .

طوری پاره ایدوب موسایی مست وصعیق ایدن تجلی برشجره دن

شعله فروز اولوب انی انا ایله اعلان وحدت ایلدی . نکات لدنیه ،
مغیبات الهیه نک مدارج کلامیه سی اولق اعتباریه ظهور ایستدیکنی
محاکم قابلیت و مظهریتنه نسبتله لایتنهای اشکال و انواع کوستردر .
هر شکل ونوعنده مندیج اولان حقیقت ینه بردر .

وحدت !

سوز ، مؤثرینک نشئه سنه تابعدر ؛ فقط اوز ؛ ینه بردر .

توحید !

تصوفاتک میزانی ، متکلمک حالیه ، اقوالنک مؤید اولماسیدر .
اولمازسه شطحات اولور . ارباب حالک اقوالی ایسه آنجق ینه ارباب
حال اولقله بیلینیر . حالسز توغل مذلقیه منجردر . بونک ایچون
استاد لندن جرعه ارشاد ایچوب مایه ذوق ایدنک احتیاجی انسان
ایچون وارد و لابدر . وابستغوا الیه الوسیله امر جلیلی بوکا اشارت
ایتمکده در .

حافظ شیرازی مرحوم نه کوزل سولمشدر .

صوفی نشود صافی ؛ تا در نکشد جامی !

تصوفک اس الاساسی عرفاندر . عرفان ایسه انسانک وظیفه
اصلیه سیدر . بشر بو وظیفه خلقیه سنی ایفا ایتمکله مکلفدر . ایتمزه
مسئولدر . چونکه یارادایشده کی سائق ، محبت اولدی . حق بیلمک
ایسته دی ، خلقی یاراندی . خلق ایله حق آراسته کی رابطه عرفان
اولدی ، نسخه کبرا اولان انسان ، هرشیدن مقدم عرفان ایله وظیفه داردر
بونی بیلمزسه حیوانیتده قالیر . خلقتک ماخلق لهی عرفاندر عکسینی
ایسه جهلدر . جهول اولان ظلوم اولور ، ظلوم ایسه ماعوندر .
عرفانی بیلمه مش ، بولامش بر انسان ظالم بالنفسدر . بوده خسران
ابدی بی موجیدر . سلامت سرمدی آنجق وظیفه اساسیه انسانیه اولان
مسلك عرفانه سلوک ایله اولور .

نیازی حضرتلری شو مصراع یی عارفانه سولمشدر .

« انسان کامل اولغه لازم اولان عرفان ایش »

معرفت الهیه عارف بالنفس اولغله حاصل اولور . بویابده هر کسک
بیایدیکنی شو حدیث نبوی وارد اولمشدر .

من عرف نفسه فقط عرف ربه . نفسنی بیان ربی بیلیر .
بوراده نفس نه در ، رب نه دیمکدر ، بوایکی نقطه نک آراسته کی
مناسبت نه دن عبارتدر ؟ بورالربنی ینه اربابی بیلیر . بو کبی مسانده
تصوف کتابلری « فافهم » اشارتیه اکتفا ایتمشدر ، بونکته یی
قارنک درجه استعداد و عرفانه برافشدر . مادام که بویله در آرتق
بوندن ده زیاده بحث ایتمک زاندر ! ینه بزده فافهم ! ایله سوزی
قیصه کسهرز

او مردان الهی که تبردن پاک دامنلر ، آنلرک دامن پاکنی
تعلق ماسوا طو تالماز . او رجال وجاهی که جلائل خلقتله میرهندلر ،
آنلرک جلباب قدسیتلرینه احیاف دنیا کند آتاماز . اونلر قباب الهی

تختده صفا کزین وحدت ، موحد ذات حضرتدرلر ، اونلر موجه
حجۃ الله ، اونلر وجهه حجۃ اللهدرلر .

بز دنیا ایچون ، دنیا اونلر ایچون . بز عقبا ایچون عقبا اونلر
ایچون اونلر

« اهل دنیا دنیاده ، اهل عقبا عقباده ،

هر کیشی بر سوداده — بکا اللهم کرک

صیحه سنی اورمشلدر .

فقر و فنا اربابی بقای حقله باقیدر ، صدق وصف ازلری کوثر
وصاله ساقیدر ، عهد و وفا ازلری لهجه ذاته ملاقیدر . تماشای جمال
ایچنده بی دللردر بیکانه دهکدرلر . هستی سوادن غافلردر جاهل
دهکدرلر . کوردرلر کوروغزلر ، بیلیرلر بیلنمزلر ، اویورلر اویانقدرلر ،
سکوتلری ذکر ، ذکرلری فکدر .

نظرلری اکسیر اعظم ، نفسلری کیمیای مطلبسدر ، سوزلری
نکات ، اوزلری برکات ، قیلری عین الحیاتدر .

ایشته متصوفه نک حال و شانی بودر ، صوفی صافی نک کمال و عرفانی
بویلهدر .

سری

فَلَسْتَفْهَمُ

لوامع

رباعیه

چه چرخ چه ارکان چه معادن چه نبات ساریست در اجزای همه سرحدات
کوبند همه کل عشق و غدا تسییح خداوند رفیع الدرجات

کرک فلک و ارکان ، و کرک معادن و نباتات ، هبسنک اجزاسنه
سرحدات ساریدر . بناء علیه جمله سی رفیع الدرجات اولان جناب
خداوند عظیمی صباح و اقشام تسییح ایدر .

تسییح ، اشیانک تقدیس و تنزیه الهی به دلالتیه تأویل ایدوبده
تسییح حقیقی نفی و انکار ایتک انیا و اولیانک علیهم السلام کشفه
مخالقدر . سر حیاتک هر شیئه سریانی . هویت الهیه نک صفت حیات
ایله منصفه اولهرق اشیایه سریانی واسطه سیلهدر . فقط هر موجودک
کندیسنه مناسب بر نوع حیاتی واردرکه کندی قابلیت و استعدادی
حسیله کندیسنده ظاهر اولور . حیاتک لوازمندن اولان علم ، قدرت ،
اراده و سائر کبی شیلردهده حال ، طبق بویلهدر . شو حالده اکر
او موجودک مزاجی اعتداله قریب ایسه اونده صفت حیات بتون
لوازمی ویا اکثریسی ایله ظاهر اولور .

انسان کبی واکر او موجودک مزاجی اعتدالدن بعید ایسه
اونده صفت حیات و لوازمی مستور قالور ، معدن و نبات کبی بناء علیه

لائق اولورکه بو بیتده (حی) دن مراد ، عالم کبیر اوله ، واوندن
بالخاصه « حی » لفظیه تعبیر ایدلسی - هر نه قدر اوندن مقصود قیله
معنایی ایسهده - مجرد حیاتک جمیع اجزاء عاله - جماد اولسون
حیوان اولسون - سریانی اشعاره مبنی اوله ، بو صورته اهل
حی دن مراد دخی شرب شراب محبه اهلیتی ، قبول اسرار معرفه
قابلیتی اولان طائفه درکه اونلرک ماعداسی عدم حکمنددر . بلکه
عدمندن دها ناقصدر .

رباعیه

آنانکه براه عشق ثابت قدمند درملک وفا بسر فرازی علیند
مقصود خلاصه وجود ایشانند باقی همه باوجود ایشان عدمند

عشق یولنده ثابتقدم اولان ذوات محترمه ، ملک وفاده سرفرازلق
ایله مشار بالبناندرلر فی الحقیقه مقصود ، خلاصه وجود ، اونلراولوب
اونلرک وجودینه نسبتله باقیلری عدم مشابهسنددرلر .

و ، حی ، دن قیله ارباب محبت ، خاندان اصحاب عشق و مودت
دخی مراد اولنق نمکندر زیرا حقیقتده زنده و حیات حقیقی به ارزنده
اولان بو طائفه دن مثلاً بری مشرقده دیکری مغربده اولسه ینه بری
برینه متصل ، ویکدیگریله یکرو ویکدل اولور .

رباعیه

عشاق توکر شاه وکر درویشند چون تیز راستی همه در کیش اند
از خویش جو عاشق نبود دل دریشند بیکانه که عاشق است با خویش اند

عاشقنلرک - کرک شاه کرک درویشی - طوغریلق خصوصنده
بای ایچندهکی بر اوق کیدرلر همده عاشق اولیان اقبالرنندن متأثر
و عاشق اولان بیکانه یهده اقبادرلر .

حی « دن انسان کاملک مجموعه وجودی ، و اهل حی » دنده
روح ، قلب ، نفس ، قوای روحانی ، جسمانی ، مراد اولق دخی
نمکندر . چونکه شراب محبتک ذکرینی سماعدن انسان کاملک وجودنده
بونلرک هر بری ایچون بر نوع سرخوشلق ، وصولک درجهده بخودلق
وارددر .

رباعیه

هر جا که کند مطرب فرخنده خطاب ذکر می عشق تو بر آواز رباب
عقل و دل و جان من شود مست خراب از ذوق سماع ذکر آن اباده ناب

شراب عشقکی مطرب فرخنده خطاب ، هر زدهده رباب آوازی
اوزره ذکر ایلسه همان بنم عظم ، دلم ، جانم ، مجرد اباده نابک
ذکرینی ایشتمک ذوقندن مست خراب اولور .

مابعدی وار

کمال الدین خرپوتی